

Satiacocca ima teppe

Santiago

Ajijaro ima teppe dsododepa Satiaco. Jeso tahimari dsodo nanicca-dsa madija onideni Satiaco cacanimanahi 4 quinajari. Ojariapa Jesocca dodosseraha najaripa ajijaro ima dsodo inejerani. Jeso ohuaha Satiaco Dsodse bedina ajijaro ima dsodo inajaro quinahi nade.

Satiacopa Isaraeri potemahi jodio madijadenidsa dsodo inajaro. Pocca dsodonijipi: Jesodsa jehe quinajaridenipa ima bicanira inanamananina bica tani. Jesodsa jehe najari ima bicani inana-jeradsapi pocca jeheniji ponima tojanitohui. Pocca dsodoniji onihipi: Iadsa ima onihi, onihi ssonaridsapi mohuaradsa inahananina bica tani. Ima ocassera tanicca ssonariraha Diodsa etidsedsanaponijine, najaro.

Satiaco nija najari

1 ¹¿Nija ohuemecotedeni? Ohuapi Satiaco tiadenidsa dsodo onajaro. Abi Diocca medse, ia Medsede Jesocristocca medse ojani. Aji *Isaraeri bedi 12 quina-jari potemahi tiquejenajaro dsama huapimadsa timadiridsa-manajaro-denidsa: –¿Bicaquiri tiquinaqui? –onajaro.

Dissessera inana, icca jeheniji paji toccarini nanijine

²Jehe ohuemecotedeni, tiadenidsa ima onihi ssonari, ima onihi ssonari naraha tettidenipi: –Epeje. Nema nehe ohuatidseni –tiquinanina bica tani, onajaro. ³Ajaropi nahatoquiri tiquinani: Tiadenidsa ima ssonarijaropi ticcadeni jeheniji ahuato tanijine tiadeni nattome tabaquiijaro. Ima ocassera taraha mohuaradsa Diocca dacorehema

tinahanamanadsapi tidacora-manani nanitohui. ⁴Nadsapi Diocca dacorehema ima tonahanade ticahatteranijine disseraquiri tiquinaji. Nema tiquinadsapi ticcadeni jeheniji Jesocristodsa pajirani-ssa tanitohui. Diodsa tidsepedeni ijimanani dsori tiquinejeranitohui.

⁵Tibodideni ssamoquiri tiquinadsapi Diocca nahatohuetohui Pohnuadsa huati tiquinaji. Diopa tiadenidsa da inanitohui. Pohnuapa huapimadsa accora tajari. Tiadenidsa: –Poni. Ssamooquiri tiquinani –njarahitohui. ⁶Naraha Diodsa huati tiquinadsa naqui tibodideni pajissa tiquinanissa tadsa huati huati titiquina naji. Tibodideni: –¿Diopa iadsa da inapadseje? ¿da inejerapadseje? –tiquinejeraji. Aja madija bodi nama najaripa pina coridsa imenicca passo jojodejine quehemama canajarossa quina-jari. ⁷Madija bodi nama nadsapa:

–Nidsa Dio ohuadsa da inanitohui
 –najarana. Diopa pohuadsa da
 inejeranitohui. ⁸Nama najaripa
 pohua bodi huatohue pamajaro.
 Diodsa pajissa nahissa tajaradsapa
 pohua bodicca ima cacajiquimera
 dsanapojaro.

⁹Ohuemecotedeni, tiadeni motapi
 ticappiramanajaro. Ajimani tique-
 jenaraha tetidsemanaji. Diodsana
 deni tiquejenani. ¹⁰Naraha ohueme-
 cotedeni tiadeni mota tidsepe-
 deni sseqquiri nadsapi Dio tiadeni
 ajamani tonanabaquijari. Naraha
 Diodsa tetidsemanaji. Pohuadsa
 tiquejenanipi ima denima bica
 tajaro. Aja dsepedeni sseqquiri
 najaripa madimanadsanapo-
 jarahitohui. Pina dsero mohueni-
 ssa quinajari jicahitohui. ¹¹Maji
 ppocoradsa dsero dseqqueri nadsapi
 mohueni catoja tani. Dserocca
 biquehepi amossisi tani. Najarossa
 najaroa madija dsepedeni sseqquiri
 najaripa denima cajimanahijine
 dsepedeni ihijimana naraha
 amossihuajahitohui.

**Ima ocassera tanicca
 inahananijine iattana**

¹²Madijapa ima ocassera tani-
 cca pohuadsa ssonari, ssonari
 naraha mohuaradsa Diocca
 dacorehema inahanadsapi Dio
 pohuadsa huatidsehe da inajaro.
 Dio pohuadsa: –Jehe, tijine bica
 tani –nadsapa camittehe jique-
 jeranica da inanitohui. Najaropi
 Dio huati tapojari, aja: –Madija
 ohuadsa huatideni huanaquiri
 najaridenidsa da onanitohui –napo-
 jari. ¹³Nadsama tibodidsa ima taba-
 ccora tanijine tia ticadossenidsapi:
 –Dio ohua cadossejari –tejerana.

Diopa ima tabaccora tajaro tohuini
 najarajari. Nohuerahi. Diopa taba-
 ccorehetohui ia totocadossebaquiqui
 najarahi. ¹⁴Naraha madija pohua
 bodidsa tabaccorehe inananijine
 ahuatomsapi pohua tohuini nadsa
 tabaccorehe inananijine pohua
 cacadosse najari. ¹⁵Ibodi taba-
 ccorehe tohuini dissera tadsapi
 imasiri inana tani. Naraha imasiri
 inana-dsanapodsapi *dsoqqeue
 jiquejeraniccadsa imadi-dsanapo-
 nitohui.

¹⁶Ohuemecotedeni, tiadenidsa
 ohuati huana tani. Paji, tia tiadeni
 ticamaidsanibaquimana-jeraji.
¹⁷Huapima bica tanicca, pajiranissa
 tajaro iadsa tojajaropi Dio meme-
 huaji madijari da inaridsajaro.
 Diopa ssiajani jinede. Pohuadsapi
 dsidsini nohuerajaro. Pohuapa apaja
 nama dsanapojari. Cacajiquimera-
 jarahi. ¹⁸Dio jipa tadsapa ajima
 inajararo: Pohua Atti pajissehe
 ponira ia mari tocanabaquidsapa
 iadsa camittehe dsati inajaropaji.
 Nama najaripa pocca madija Pohua-
 dsa bicaquiri inanijine. Pocca
 nahatonaja huapima Pohuadsa
 bicaquiri naraha iana Pohuadsa
 denima bicaquiri inajaropaji.

**Diocca dosseniji ecahuanissa
 tajarocca ima**

¹⁹Ohuemecotedeni, tiadenidsa
 ohuati huana tani. Occa marinaja
 tetideni ajimamana-jeraji. Tiadeni
 huapima ima timittamananissa
 tanijine teribodeni ssiajaquiri
 nadsapi bica tani. Mohuaradsa
 tibodideni huatonissa tapodsana
 huati huati tiquinani bica tani.
 Amadsati tedimana-jerani naqui
 bica tani, onajaro. ²⁰Aja madija

huadi tajaripa Dio Pohua jipa tahiccassa inana-jerani. ²¹Nadsapi ajijaro namicca tabaccorehe onihi, onihi najaro huapima tineboridsa-manaji. Mohuaradsa Dio Attidsara iboraquuri tiquinana. Dio Atti timittamana, Jesocristo tahimari timittamana najaroa tibodidenidsa madidsajaropaji. Najaro Jesocristo tahimaripa tiadeni tonassija-baqquihijine dacorajari.

²²Nadsama Dio Atti teribodeni-dsa timittamanani ojari-jerana. Dio Atti timittamanadsa Pohua Attissa tinanamanana bica tani. Pohua Atti ponima timittamanadsapi tiadenira tiadeni ticamaidsanimanarana. ²³Madijapa Dio Atti mittaraha najarossa inana-jeradsapi pocca ima pina pipiridsa pohua pano qqui tajarissa najari. ²⁴Pipiridsa pohua pano qqui taraha piti nahuajani-dsapa huati ajama najarissa najari. ²⁵Naraha madija Dio Atti mittadsa huati ajama-jaradsapa bica tahi. Jesocristo ia todinibaqquihijinecca marinaja iadsa pajiranissa tajaro. Madijapa najaro marinajadsa bodi huatoma huatoma nadsa najarossa inanadsapi pohua dsepe ijjaridsa Dio pohuadsa ima bicani inananitohui.

²⁶Madija pohua bodi: –Ohuapi Diocca ojani –naraha pohua ebenodsasimasiri huatide apaja najaradsapa pohua tocamaidsanijari. Pocca jeheniji Diodsa ponima tojajaro. ²⁷Naraha madija Diodsa jehe nahissa tajaripa ajijaro dsamacca imasiridsa quejema-jarajari. Ejedeni medse toquejenajari, amoneje tabira tocajamanajaro ocasserani ahuamanadsapa acco camade jipa tajari. Madija nama najaripa icca Abi Diodsa bica tajari.

Tohuati huanehecca marinaja

2 ¹Ohuemecotedeni, ia Medsede deni tojajari Jesocristo bicabotedsa pajissa tiquinajaropi ¿madija huapimadsa bicaquuri tiquinaqui? Madija ojariadsa bicaquuri tiquinaraha ohuahadsa najarossa tinanamanajeradsapi ticcadeni ima bica tejerani. ²⁻³Ajima tiquinanitide. Aji titiqueriqui nanihuaji madija etero bicani huedsa, todsepecca oro nahatoni bicani sse tajari qquedsimadsapa pohuadsa: –Aji huihuittari bicanirasa tittariji –tiquinanitide. Naraha madija eterori jorara taha qquedsimajari-dsapi: –Nanidsa teji. Namidsa naqui tittani bica tani –tiquinanitide. ⁴Nema tiquinadsapi ticcadeni ima bica tejerani. Tiadenipi tibodideni bica tejerarajojine titessedeni ticattejidsa-baqquimanajari.

⁵Ohuemecotedeni, tiadenidsa ohuati huana tani. Ajijaro ima timittamananissa taji: Diopa ajijaro dsamacca madija tohuati nahanaqquri najaridenina icattejidsabaqqujari, poccadeni jeheniji dacoranijine, pocca cacahuehe pohuadenidsa tojanijine. Pocca cacahuehepi Pohuadsa huatideni huanaquuri najaridenidsa tojajaro, pina Pohua huati tapojarissa najaro. ⁶Naraha tohuati nahana tajari tiadenidsa qquedsimadsapa ajamani tinanamanajari. Jari tibodideni huatoji. Madija dsepedeni ssequiri najaripa ¿tiadeni tocamaidsabaqquimanajaraco? ¿Ima cacattemadehuaji naco tiadeni tohuaccabaqquimanajaraco? ⁷Pohuadeni mota naco ¿Jesocristo onidsa tatamasso quina-jaraco? Pohua oni bicabotedsa tiadeni tocanacani-baqquimanaraha

pohuadenidsana denima bicaquiri tiquinajarorane.

⁸Aji Diocca dosseniji deni tojani-ccapi ajima najarona paji: –Tinori-deniccadsa tetideni huanaququiri naji, pina tiadenidsa tetideni huanaququiri najarossa naji –nahi nade Dio Atti. Nema tiquinadsana ima bicani tinanamanajaro. ⁹Naraha madija ticattejidsa-baququimanadsa ojariadsa tetideni huanaququiri naraha ohuahadsa tetideni huaneraququiri nadsapi imasiri ticajimanajaro. Diocca dosseniji dsori tinanamanajaro.

¹⁰Nadsama madija Diocca dosseniji ecahuaraha mota ojarie dsori inana-dsapi Diocca dosseniji nemaneheddsori inajarossa najaro. Nadsapa ima cajijari. ¹¹Aja Dio Pohua ojarijari huati tajaripa: –Madija ohuahacca amoneje tija tejeraji –najari. –Madija tijine ahua-jeraji –najari naco huati tajari. Nadsapa madija pohua tessacca amoneje ijajeraraha madija inanadsoquedsapa Diocca dosseniji dsori inajararo. ¹²Nidsa Dio madija huapimacca ima cattemade tojadsapa imasiridsa ia tappa tabaququihijinecca marinajadsa icca ima nattomede tojahitohui. Nema nadsapi huati huati tiquinani bica tanijine tettideni tecahuamananissa taji. Tidsepedeni ijimanadsa naqui ima bicanira tinanamanaji. ¹³Aji tiadeni madija ohuahadsa tetideni huaneraququiri nadsapi manaco tiadenidsa Dio huati huanera tadsa: –Ticcadeni ima bica tejerani –nahitohui. Naraha madija ohuahadsa tetideni huanaququiri nadsana Diopa huati huana tajari. Nidsa Dio madija huapimacca ima cattemade tojahijinecca huada bacco tadsapi tiadenidsa: –Ticcadeni ima ohuadsa bica tani –nahitohui.

Ima bicani inajarodsa icca jeheniji ahuato inananijine

¹⁴Ohuemecotedeni, tettidenipi: –Iapi Jesocristodsa jehe inajaro –tiquinaraha ima bicani ahuato tinanamana-jeradsapi ticcadeni jeheniji ponimassa najaro. Ponima Jesocristodsa jehe tiquinadsapi ¿ticassiejerapadseje? Nohueranitohui. ¹⁵⁻¹⁶Pina timecotedeni Jesocristodsa jehe quinajari maququideje itide, amoneje nitide ojarie etero cappira, dsamata cappira naha madijaridsa tiadeni ojarie atti ajama nahitide: –Epeje, ticcaniji. Diona tia acco camahitohui. Ssiri tani, ticca etero onihira tiedsaniji. Tipemini, tijipanissa taji –najari. Pohua atti bica taraha pohua imecote cappirahicca da inajaradsapa pocca jeheniji ponima tojajaro. ¹⁷Madija atti nama najaripa Jesocristodsa jehe nahira ojarijari. Pocca madiedsa ima bicani inana-jeradsapi pocca jeheniji huatiajarossa najaro.

¹⁸Timecotedeni ohuaha pohua tessedsa ajama nahitide: –Tiapi Jesocristodsa jehe tanira ojari najaro. Naraha ohuapi ima bicani ohonana najaro –najari. Naraha ohua Satiaco ohuattipi: Jari, ticca jeheniji ohuadsa ahuato tinanaji. Ima bicani tinana-jeradsapi ticca jeheniji qqui onejerani. Naraha ohuapi ima bicani onanajarodsa occa jeheniji ahuato onanajaro. ¹⁹Tiapi: –Diopa ojarihi. Ohuaha nohuerahi –tanipi bica taraha tocorimedeni naco: –Diopa ojarihi. Ohuaha nohuerahi –quiquinanjari. Naraha Diocca najidsohue noppineni cappinamanadsapa tacca-cca-cca quinajari. ²⁰¡Tiapi ssamo tina-jeraji! Ajijaro ima tiattaji. Jesocristodsa

jehe taraha ima bicani tinanajera-dsapi ticca jeheniji ponima tojajaro.

²¹Maittaccadsama icca idi

*Abarahaopa pocca ejedeni Isahaca Diodsa da inahijine eccorajari. Pocca ejedeni siba hua tamaroni tetepidsa ibaridsa inandsoqqe-hijineraha pohuadsa Dio huahua najari: –¡Pohua, tinandsoqqe-jarajo! –najari. Abarahaocca iborehe Diodsa ahuato tadsapi: –Ticca ima bica tani ohuadsa –najari Dio. ²²Nadsama Abarahaocca imadsa icahatterani: Pohua inananicadsa pocca jeheniji ahuato inanajaro. Pohuajine pocca jeheniji Diodsa pajiranissa tajaro. ²³Abarahao nama napojaripa Dio Atti dsodo nanicadsa ahuato tajaro. Najaropi ajima najaro: –Abarahao Diodsa jehe nahissa tadsapa pohuadsa Dio Attipa: “Ticca ima bica tani ohuadsa” najari –nani nade Dio Atti dsodo nanidsa. Abarahao pohuadsa naco: –Dio Pohua tesse –quiquinanahi nade. ²⁴Jidapana timittamanani: Madijacca ima Diodsa bica tajaropi Diodsa jehe najari ojari-gerani. Pohua inananicadsa pocca jeheniji ahuato inanajaro. Nadsana Diopa: –Pocca ima bica tani ohuadsa –najari.

²⁵Amoneje huananari Rahabacca ima naqui pina Abarahaocca imassa najaro. Diocca madija Isaraerideni pamaha ponicca dsamahuaji nocco-dsade huedajonadsapa pohuadendi acco icamabaquijari. Topamajona-hijineraha ponicca odsa bodihuaji inajimabaquijari. Tohuedanipomahijine naco jahui onihi dsopi icanabaquijari. Nadsapi ponicca acco camehe Diodsa bica tadsapi Pohua Attipa: –Ponicca ima ohuadsa bica tani –najari.

²⁶Jehe, ajijaro ima huapimapi pina essirecca imassa najaro. Jassi jassi inejeradsapi essire huatiajaro. Najarossa najaro etti: –Jesocristo-dsa jehe onajaro –inaraha Dio jipa tahiccassa inana-geradsapi icca jeheniji huatiajaro.

Ebenocca ima

3¹Ohuemecotedeni, tiadenedi-dsa Dio Atti maridedeni huapi tajarana. Nahatoquiquiri tiquinani: Ia Dio Atti maridedeni ima inandsoapi nidsa dsotode Dio madijacca ima cattemade tojadsapa icca ima manaconi pina madija ohuahadenidsassa nejeranitohui. Iadsapi denima oppina tanicca inananitohui. ²Madija ia huapimapi ima bica tejeranicca inana tani. Naraha madija ojaria pohua atti ecahuanissa tadsa, tabaccora tanicca huati tajaradsapa najarina bica tajari. Pocca ima pajiranissa tajaro. Nama najaripa pohua ebenodsa pohua assiredsa naco imasiri inana-geranijine pohua cacahuade nahato tajari.

³Nadsama bojo naqui. Ajarinidsa ppejo badsira tajaro oro tajarodsa ia tohuini inanihuaji joca



inadsapi poni assirani nemanehé nanihuajina toccajaro. ⁴Coridsa imenicca *canoa imenibotedsa naqui ibodi huatona. Etero huena-cossa nadsa jojode ssonaridsapi totohuacca najaro. Ahaccadepa ahaccarini badsira tajarodsa acca acca najari. Canoa imenidsa jojode dacorehe ssonariraha ahaccade pohua tohuini nahihuaji acca icanadsapi nahihuajina totohuacca najaro. ⁵Najarossa najaro ebenocca ima naqui. Ebono badsira taraha ima imeni totonana najaro. Dsippo naqui jororoni badsira taraha najarojine dsama imeni diji tanijine pajirani. ⁶Aji ebenopi pina dsipossa najaro, oppina tani. Imedsa tohuariraha imasiri ijjarojine essire nemanehé inatabaccora tani. Najidsohue jiquejeranicca jororoni ebeno iessidsapi diji dsanapo tani. Nema nadsapi icca madie nemanehé totabaccora tani.

⁷Madija iapi bani huapima ette ija tahi. Bani eppe cajihi, macca, passo abari naco ette ijahijine pajirahi. ⁸Naraha ebenopi imasiri sse tajarojine pina bani huadi tajarissa najaro. Ette ijaniijine ipajirajerani. Pina macca ino comenessa najaro, toponi nanadsoqqe tani. ⁹Ebenodsa ia Medsede Abi Diodsa etidsedsapi: –Bica tinani –inajaro. Naraha Dio pina Pohuassa naha madija inahatobaqquijari-denidsa huadi inadsapi: –Tabaccoraquiqui tiquinani –ina tani. ¹⁰Ejeri poni ojariraha najarodsa ima bicani qquena, ima tabaccora tanicca qquena nani caji tani. Jaho, ohuemecotedeni, nema nanipi bica tejerani. ¹¹Aji sibacca passo qquenajarodsa ¿passo bicani,

passo bida tajararo tadsajani qquena taqui? Nohuerani. ¹²Najaro imassa najaro oribo bonopa ahua iquiera-dsa cahua-jarahi. Iquiera bono naco uva ededsa cahua-jarahi. Ohuemecotedeni, sibacca passo qquenajarodsa passo saho cajinicca passo bicani tadsajani qquena-jerani. ¡Nohuerani!

Tohuattehe Diocca daniji

¹³¿Nejecojari tiadenidsa Djojine nahato taha madijari? Pajissa nahato tadsapa pocca madiedsa ahuato inanana. Djojine nahatoqquri tiquinadsapi ima bicani tinanamanaji. Jonequiqui tiquinadsa: –Ohuapi ajimani ojani –titiquina naji. ¹⁴Naraha tibodidenidsa madija cajijaricca acconi huadiquiqui, ticcadeni amonejedsa tetideni huatoquiqui nadsapi tibodideni pina bida tajarossa najaro. Tiadeni deni tinanamananijine tohuira disseraquiqui tiquinadsa naqui bica tejerani. Nadsapi: –Ijine bica tani –tiquinejeraji. Tiadenipi pajissacca tohuattehe ticappiramanani. ¹⁵Ticcadeni tohuattehepi Diocca daniji jerani. Ajijaro dsamacca tohuattehera ticajimanajaro. Tibodidenicca huatohuepi madija bodidenicca. Diocca huadi Satanjine naqui tibodideni huatoridsajaro. ¹⁶Nadsama madija cajijaricca acconi huadiquiqui, ticcadeni amonejedsa tetideni huatoquiqui nadsa, tiadeni deni tinanamananijine tohuira disseraquiqui tiquinadsapi tiadenidsa ima tabaccora tajararo caji tanitohui. Tabaccorehe onihi onihi naqui tojaridsanitohui. ¹⁷Naraha Djojine nahatoquiqui tiquinajaropi tibodideni ssiajaquiqui

nehe imasiri jirehe timadimanani-ssa tajaropaji. Joneqquri tiquinadsa mohuaradsa timadiridsamajaropaji. Diojine nahatoqquri tiquinadsapi madijadsa bicaqquri tiquinajaro, madija ohuaha atti-denidsa jehe tiquina tani, timecotedenidsa tetideni cahanariri canajaro. Madija huapimadsa najarossa tinanamanajaro. Ojariadsa: –Tiapi poni –tiquinejerajaro. Maidseraqquri tiquinajaro. Ima bicani tinanamanani huapi tani. ¹⁸Madija totonajonede tiquejenadsapi pina jonehe ppa tiquinajarossa najaro. Moro tadsapi bononi cajijaro. Najaropi ima bicani pajiranissa tanicca tohuapiridsajaro.

**Ajijaro namicca imatohuira
huatideni huanaqquri najari**

4 ¹Tetideni huatoji. ¿Nejecojine ticahadirere cacana najaro? Tabaccorehe tohuini tiquinajarocca tibodidenidsa huadi huadi najarojine ticahadirere cacana najaro. ²Madija ohuahacca tohuini tiquinarahaha tiadenidsa toja-jeradsapi tijinedeni ahuanijine tohuini tiquinajaro. Todseptajaji acconi nitide, amoneje acconi nitide, tohuini tiquinanicca onihini nitide, najaro acconi tedi-manadsa ticahadirere canajaro. Tohuini tiquinanicca tohui Diodsa huati tiquinejeradsapi ticappiramanajaropaji. ³Pohuadsa huati tiquinadsa naqui tiadenidsa da inejerani, ticcadeni huatinaja bica tejeradsa. Tabaccorehe tohuini tiquinanicca tohui, tetidsemnanijine tohuira huati huati tiquinadsapi tiadenidsa da inejerani. ⁴Jaho, ima onihitohui jai tijaridsajaropi pina amoneje maqquideje

ohuahatohui ccaridsajarossa tiquinajaro. ¿Nahatoqquri tiquinejerajaroqui? Ajijaro namicca ima tohuini tiquinadsapi poni tassani tiquejenajaro. Nadsapi Diocca huadi tiquejenajaro. ⁵Dio Atti dsodo nanipi ponima jerani. Pohua Atti dsodo nanidsa ima imittajaropi: Dio Pohujine icorime icajijaro. Najaro pocca danijidsa huati huana tajari. Ima onihidsa iquejenadsapi eccone huadi tajari. ⁶Nadsapa iadsa huati cahanari canadsa ima onihidsa iejidsanijine ia acco tocamabaqqujari. Najarojine Dio Atti dsodo nanidsapi ajima najaro:

–Aja “Deni iquejenani, iana nahatoqquri inani” quiquinanajaridenidsa Diopa jipera tajari.

Naraha ajamani toquejenajari-denidsana Pohuapa bica taja, huati cahanari canaja najari –nani nade Dio Atti dsodo nanidsa.

⁷Nadsapi Diodsa iboraqquri tiquinaji. Pocca huadi *Satanadsa tiejidsamananijine dacoco tijiraji. Nadsapa Satana tinoppedeni joppa tahitohui. ⁸Dio Pohuadsa huajiraqquri tiquinaji. Manaco Diopa tiadenidsa huajira tahitohui. Ticcadeni imasiri tinebomanaji. Pina tidsepedeni ssahua tiquinajarossa tiquinaji. Ticcadeni imapi pamajaro: Diodsa tetideni huanaqquri, ajijaro namicca imadsa tetideni huanaqquri najaropi bica tejerani. Tibodidenicca ima tinahiremananijinepi ajijaro namicca ima tinebomanadsa Dio-tohuira tetideni huanaqquri naji. ⁹Tibodideni cacajiquimeradsapi: –Jaho, ojine ima tabaccora tani

–tiquinaji. Tibodideni huanacossa-dsa jadsirema oji oji tiquinaji. Jaja tiquineri naridsajaropi tinebomana-dsa tinoccodeni ppajanira toccaji. Ticcadeni huatidsehe tinebomana-dsa oji oji tiquinaji. ¹⁰Ticattedsa-manadsa ia Medsede Diodsa huati tiquinaji: –Iapi ssamoqquiri inani, ajimani iquejenani –tiquinaji. Nadsana tiadeni tonatehemabaqqi-dsa tiadeni deni tonanabaqqi-hitohui.

**Timecotedsa: –Ticca ima
bica tejerani –tiquinejeraji**

¹¹Ohuemecotedeni, timecotedeni-icca ima: –Tabaccora tani –tiquina-dsa ahuaji huati ahuaji huati tiquinejeraji. Timecotedenidsa ima tabaccora tanicca huati tiquinadsapi Diocca dosseniji: –Tinorideniccadsa tetideni huanaqquiri naji –najarodsa tettidenipi: –Diocca dosseniji tabaccora tani –tiquinajarossa najaro. Nadsapi Diocca dossenijidsa iboqquiri tiquinani ahuato tajaro. ¹²Dio Puhuana ojarijari pocca marinaja inahatodsa iadsa da inajaro. Puhuana pocca marinajadsa icca ima nattomede pajirajari. Madija inassiajabaqquihijine pajira, madija najidsohue jiquejeranihuaji inana-baqquihijine pajira najari. Tiadenipi Diossa tiquinejerani. Timecotedsa: –Ticca ima bica tejerani, tabaccora tani –tiquinanijine bica tejerani.

**Itedsejemacca ima
ssamomo inani**

¹³Tettidenipi: –Jidapana, dsemassa nitide, odsa pananihuaji jaijadsa huajano ojaria nanidsa imadidsa idsepe ijidsapi dsiniro ssequiri inana –tiquinanitide. Nema

tiquinajarodenidsa huati onana. Titaharibobo canaji. ¹⁴Titedsejemadenicca ima ssamoqquiri tiquinani. Madija iapi pina dsidsidsamassacca essen iahuato, amadsati amossi najarossa inajaro. ¹⁵Naraha tetti-denipi: –Dio jipa tadsa imadidsa idsepe ijiniijine –titiquina nadsana bica tani. ¹⁶Naraha tiadenipi: –Ia motta nahatoto inani –jidede tijirani. Nema tiquinanipi pina: –Dio jirehe nahatoto inani –tiquinajarossa najaro. Najaropi tabaccora tajaro. ¹⁷Ima bicani tinanamana-nijine nahatoqquiri tiquinaraha nema tinanamana-jeradsapi imasiri tinanamanajaro.

**Dsiniro, todsepetaji ssequiri
najaridenicca ima**

5 ¹Titaharibobo canaji, tidsepedeni ssequiri najaro tiadenidsa huati onana. Tiadenidsa ima tabaccora tanicca ssonaridsapi ocasserani temanitohui. Najaro noppineni oji oji tiquinaji, johua johua tiquinaji. ²Tidsepedenitajipi jadsinitohui. Ticcadeni etero naqui poni maccanijine ssari nanitohui. ³Ticcadeni oro, dsiniro naqui tecahuamanaraha bote-dsapi ponima tojajaro. Dsama jicanicca huada tohuajirajonaraha dsiniro tinehemamanajaro. Ticcadeni dsiniro botejarodsa accoqquiri tiquinani ahuato tajaro. Nidsa najidsohue jiquejeranihuaji Dio tiadeni dosse tabaqquidsapa ticcadeni dsiniro botejaropi pina dsipossa najaro timedeni inacanitohui. ⁴Ticcadeni dsinirojine ticcadeni accohuecca ima Diodsa ahuato tajaro. Aja madija ticcadeni huidsajadsa dsepedeni ijimanaraha

pocadeni tarabaisa manaconi pohnadenidsa da tiquinejeradsapi najaro manaconitohui tiadenidsa huati huati quinahi Dio Dacorabote mittajari. ⁵Nadsama tidsepedeni ssequiri najarodeni ajiaro namidsa timadimanaccadsa huapima bica tanicca ticajimanajaro. Tohuini tiquinanicca najarossa tinanamanajaro. Todsepetaji tinehemanajaropi pina bohui tapa tapa quinadsa tohuimajarissa najaro. Bohui tohuimajaripa ssamo taraha inanasoqqe-manahitohui. Najarossa najaro tiadeni naqui tijcanitohui. ⁶Tiadenipi madija ima cappiramanajaridenidsa tetideni huaneraquiri najaro. Pohnadenipa jonequiri najari, pohnadeni acco camamanahijine cappiramanaraha pohnadenidsa ponima ima tinassonarimanadsa tinajicamanajari.

**Ima ocassera taraha
mohuaradsa inahananijine**

⁷Naraha ohuemecotedeni, tiadenipi ia Medsede Jesocriso ccanihicca huada bacco tiquinanijine mohuaradsa timadimanasanapona. Pina huadsaja ppappadessa tiquinaji. Pohnapapasso ccanitohui mohuaradsa madicajari, pocca ppa nahi moro tahissa tahijine. Bono jadadsa pore inahijine tohui naco mohuaradsa madicajari. ⁸Tiadeni naqui dacoco tijiradsa mohuaradsa timadimanascaji. Ia Medsedepa ccanibote nahi.

⁹Ohuemecotedeni, timecotejine bica tejeradsapi pohna tahimari madija ohuahadsa huati tiquinejeraji. –Pohnajine tabaccora tani –tiquinadsapi nidsa ia Medsede ima cattemade

tojadsapa: –Tettideni bica tejerani –nahitohui. Diopa madija imarideni cattemade ccanibote nahi.

¹⁰Ohuemecotedeni, Dio Atti cacomeraquiri najarideni ia Medsede onima huati huati naridsamanadsapa ocasserehedsa madimanaraha mohuaradsa dsepedeni ihijimana najari. Tiadeni naqui pina pohnadenissa tinamananijine disseraquiri tiquinaji.

¹¹Aja ocasserehe tonahanamanajari tahimaridenidsa ibodi huato dsapi: –Huatsidsehe imeni caji-manahi. Diopa pohnadenidsa ima bicani inananitohui –ihinanajaro. Tiadenipi madija oni Jobocca ima nahatoto tinani. Jobopa ocasserani ahuaraha *mohuaradsa tonahanajari. Najaro ocasserehe jicadsana Diojine tonomijari, bica tanicca naco cajipomajari. Pohna tahimaridsa Diocca tohuati huanehepi ahuato tajaro. Ia Medsede Diopa ocasserani ahuamanajaridenidsa huati cahanari canajari.

¹²Ohuemecotedeni, tettidenissa tinamananijine huati tiquinadsapi: –Ohuattipi pajissa, meme oninidsa huati onajaro –tiquinejeraji. Tettideni onihi naqui: –Ohuattipi pajissa, ajiaro nami oninidsa huati onajaro –tiquinejeraji. Tettidenidsa ima onihi tinaharimanani naqui bica tejerani. Pajissara huati tiquinaji. Jehe tiquinadsapi pajissara jehe tiquinaji. Poni tiquinadsa naqui pajissara poni tiquinaji. Nema tiquinadsapi Dio tiadeni tonajidsobaquijarahitohui.

**Diodsa huati huati
inanijinecca ima**

¹³¿Nejecojari tiadenidsa bodi ocassera tajari? Najaripa Diodsa

huati huati tana, acco icama-hijine. ¿Nejecojari bodi huatidsejari? Najaripa Diodsa jiri jiri nana. ¹⁴ ¿Nejecojari coma tajari? Najaripa *Jesodsa jehe quinajarideni caca-huadedeni huahua tajonabaquijio. Jahijonadsapa coma tajari tatidsa oqui sse quinadsa tonomihijine Diodsa huati huati toquinana, ia Medsede Jeso onima. ¹⁵ Bodideni: –Pajissa Diopa pajirahi –quinadsa coma tajari tonomihijine Diodsa huati huati toquinadsapa tonomi tahi. Aja coma tajari imasiri inana-pojarodsa naco Diopa pocca imasiridsa: –Epeje, ohuati ajimani –nahitohui.

¹⁶ Nadsapi Diocca tonanomie tohuini tiquinadsapi ticcadeni imasiri timecotedenidsa tecomermanaji. Poccadeni naqui tiadenidsa ecomeramananjine. Tocanomirehijine timecotedenitohui Diodsa huati huati tiquinaji. Pohuadeni naco titohuideni Diodsa huati huati toquinahijine. Madija bica tajari Diodsa huatide dissera tadsapa

pocca huatinaja dacorehe caji-jari. ¹⁷ Maittaccadsama *Dio Atti cacomerabote Eria naco pina iassa naraha pocca dsamadsa passo qqejeranjine Diodsa huatide dissera tadsapa Diopa pina Eria attissa inanjaro. Huajano 3 denima abadsico 6 canaha passo qqejerajaro. ¹⁸ Dsotode Eria passo ccapomanijine Diodsa huati tapomadsapa passo ccapomajaro. Nadsapi nami tobicapomadsa ppa nahi bono cajiridsapomajari, quinahi nade.

**Imecotedeni acco
icamabaquihijine**

¹⁹ Ohuemecotedeni, timecote ojaría Diocca pajissehedsa huere tojidsadsapa Diodsa tinanani-manapomajo. ²⁰ Nadsapa tiadenipi nahatoto tinaji: Madija imasiridsa ccaridsadsapa dsoqqehe jiquejerenihuaji tojahijineraha pocca imasiri nebohijine acco ticamamanadsa Diodsa tojadsapa tinassajamanejari. Dio naco pocca imasiridsa: –Epeje, ohuati ajimani –nahitohui.